

四庫全書薈要

• 乾隆御覽本

史部

欽定四庫全書薈要

史部
史記卷

七十一至
七十二

詳校官主事銜臣徐以坤



史記卷七十

漢 太 史 令司馬遷 撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

張儀列傳第十

張儀者魏人也

集解駙案呂氏春秋曰儀魏氏餘子索隱晉有大夫張老又河東有西張城張

氏為魏人必也而呂覽以為魏氏餘子則蓋魏之支庶也又書略說以餘子謂之季子也正義左傳晉有公族餘子公行杜預云皆官卿之嫡為公族大夫餘子嫡子之母弟也公行庶子掌公戎行也藝文志云張子十篇

在縱橫流

始嘗與蘇秦俱事鬼谷先生學術蘇秦自以不及

張儀張儀已學而游說諸侯

索隱說音稅

嘗從楚相飲已而

楚相亡璧門下意張儀曰儀貧無行必此盜相君之璧

共執張儀掠笞數百不服釋之

集解駟案釋音釋索隱古釋字

其妻曰

嘻

索隱嘻音僖鄭玄曰嘻悲恨之聲

子母讀書游說安得此辱乎張儀

謂其妻曰視吾舌尚在不其妻笑曰舌在也儀曰足矣

蘇秦已說趙王而得相約從親

索隱從音足容反

然恐秦之攻

諸侯敗約後負念莫可使用於秦者乃使人微感張儀

曰子始與蘇秦善今秦已當路子何不往游以求通子

之願張儀於是之趙上謁求見蘇秦蘇秦乃誠門下人

不為通又使不得去者數日已而見之坐之堂下賜僕

妾之食因而數讓之

索隱按謂數設詞而讓之讓亦責也數音朔

曰以子之

材能乃自令困辱至此吾寧不能言而富貴子子不足

收也謝去之張儀之來也自以為故人求益反見辱怒

念諸侯莫可事獨秦能苦趙乃遂入秦蘇秦已而告其舍人曰張儀天下賢士吾殆弗如也今吾幸先用而能用秦柄者獨張儀可耳然貧無因以進吾恐其樂小利而不遂故召辱之以激其意子為我陰奉之乃言趙王發金幣車馬使人微隨張儀與同宿舍稍稍近就之奉以車馬金錢所欲用為取給而弗告張儀遂得以見秦惠王惠王以為客卿與謀伐諸侯蘇秦之舍人乃辭去張儀曰賴子得顯方且報德何故去也舍人曰臣非知

君知君乃蘇君蘇君憂秦伐趙敗從約以為非君莫能
得秦柄故感怒君使臣陰奉給君資盡蘇君之計謀今
君已用請歸報張儀曰嗟乎此吾在術中而不悟吾不
及蘇君明矣吾又新用安能謀趙乎為吾謝蘇君蘇君
之時儀何敢言且蘇君在儀寧渠能乎

集解駟案渠音詎索隱古字少

假借張儀既相秦為文檄

集解徐廣曰一作咫尺之檄索隱王劭按春秋後語云文

二尺檄許慎云檄二尺書也為檄即傳檄爾

告楚相曰始吾從若飲

索隱若汝也下

文而亦訓汝

我不盜而璧若答我若善守汝國我顧且盜而

城苴蜀相攻擊

集解徐廣曰譙周曰益州天苴讀為芭黎之芭音與巴相近以為今之巴郡索

隱苴音巴謂巴蜀之夷自相攻擊也今作苴者按巴苴草名今論巴遂誤作苴也或巴人巴郡本因巴苴得名所以其字遂以苴為巴也注引天苴即巴苴也譙周蜀人也知天苴之音讀為芭犁之芭按芭犁即織木茸所以為葦籬也今江南亦謂葦籬曰芭籬正義華陽國志云昔蜀王封其弟于漢中號曰苴侯因命之邑曰葭萌苴侯與巴王為好巴與蜀為讐故蜀王怒伐苴苴奔巴求救於秦秦遣張儀從子午道伐蜀王自葭萌禦之敗績走至武陽為秦軍所害秦遂滅蜀因滅巴蜀二郡括地志云苴侯都葭萌今利州益昌縣五十里葭萌故城是蜀侯都益州巴子城在合州石鏡縣南五里故

墊江縣也巴子都江州在都之北又峽州界也

各來

告急於秦秦惠王欲發兵以伐蜀以為道險狹難至而

韓又來侵秦秦惠王欲先伐韓後伐蜀恐不利欲先伐

蜀恐韓襲秦之敝猶豫未能決司馬錯與張儀爭論於

惠王之前

索隱錯音七各反又音七故反

司馬錯欲伐蜀張儀曰不如

伐韓王曰請聞其說儀曰親魏善楚下兵三川塞斜谷

之口

集解徐廣曰一作尋成牟鞏縣有尋口索隱尋斜聲相近故其名惑也戰國策作輶棘緱氏之口亦

其地相近也斜谷地名正義括地志云溫泉水即尋源出洛州鞏縣西南四十里注水經云郛城水出北山郛溪又有故郛城在鞏縣西南五十八里按洛州緱氏縣東南四十里與郛溪相近之地

當屯留之

道

正義屯留洛州縣也道即太行羊腸阪道也

魏絕南陽

正義南陽懷州也是當屯留之道令

魏絕斷壞羊腸韓上黨之路也

楚臨南鄭

正義是塞斜谷之口也令楚兵臨鄭南塞棘斜口斷韓

南陽之兵也

秦攻新城宜陽

索隱新城當在河南伊闕之左右正義洛州福昌縣也

以

臨二周之郊誅周王之罪侵楚魏之地周自知不能救
九鼎寶器必出據九鼎案圖籍挾天子以令於天下天
下莫敢不聽此王業也今夫蜀西僻之國而我翟之倫
也敝兵勞衆不足以成名得其地不足以為利臣聞爭
名者於朝爭利者於市今三川周室天下之朝市也而
王不爭焉顧爭於戎翟去王業遠矣司馬錯曰不然臣

聞之欲富國者務廣其地欲彊兵者務富其民欲王者

務博其德三資者備而王隨之矣今王地小民貧故臣

願先從事於易夫蜀西僻之國也而我翟之長也有桀

紂之亂以秦攻之讐如使豺狼逐羣羊得其地足以廣

國取其財足以富民

索隱戰國策取作得

繕兵不傷衆而彼已服

焉

正義繕音膳同繕具食也

拔一國而天下不以為暴利盡西海而

天下不以為貪

索隱西海為蜀川也海者珍藏所聚生猶謂秦中為陸海然也其實西亦有海

所以云西海正義海之言晦也西夷晦昧無知故言海也言利盡西方羗戎

是我一舉而名

實附也

索隱名謂博其德也實謂得土地財寶也

而又有禁暴止亂之名今

攻韓劫天子惡名也而未必利也又有不義之名而攻

天下所不欲危矣臣請論其故

索隱論者告也陳也故謂陳不宜伐之端由也

周天下之宗室也齊韓之與國也周自知失九鼎韓自

知亡三川

正義韓自知亡二周故與周并力合謀也

將二國并力合謀以因

乎齊趙而求解乎楚魏以鼎與楚以地與魏王弗能止

也此臣之所謂危也不如伐蜀完惠王曰善寡人請聽

子卒起兵伐蜀十月取之

索隱六國年表在惠王二十二年十月也正義表云秦惠

王後元年十月擊滅之

遂定蜀貶蜀王更號為侯而使陳莊相蜀

蜀既屬秦秦以益彊富厚輕諸侯秦惠王十年使公子

華

集解徐廣曰一作華

與張儀圍蒲陽

索隱魏之邑名正義在隰州隰川縣蒲邑故城是也

降之儀因言秦復與魏而使公子繇質於魏儀因說魏

王曰秦王之遇魏甚厚魏不可以無禮魏因入上郡少

梁謝秦惠王惠王乃以張儀為相更名少梁曰夏陽

集解

徐廣曰夏陽在梁山龍門索隱夏音下山名亦曰大夏禹所都正義少梁城同州韓城縣南二十三里夏陽城在縣南二十里梁山在縣東南儀相秦四歲立惠王為十九里龍門山在縣北五十里

王

正義表云惠王之十三年周顯王之三十四年也

居一歲為秦將取陝築上

郡塞其後二年使與齊楚之相會齧桑東還而免相相

魏以為秦欲令魏先事秦而諸侯效之魏王不肯聽儀

秦王怒伐取魏之曲沃平周復陰厚張儀益甚張儀慙

無以歸報留魏四歲而魏襄王卒哀王立張儀復說哀

王哀王不聽於是張儀陰令秦伐魏魏與秦戰敗明年

齊又來敗魏於觀津

集解駟案觀音貫

秦復欲攻魏先敗韓申

差軍斬首八萬諸侯震恐而張儀復說魏王曰魏地方

不至千里卒不過三十萬地四平諸侯四通輻湊無名山大川之限從鄭至梁二百餘里車馳人走不待力而至梁南與楚境西與韓境北與趙境東與齊境卒戍四方守亭鄣者不下十萬梁之地勢固戰場也梁南與楚而不與齊則齊攻其東東與齊而不與趙則趙攻其北不合於韓則韓攻其西不親於楚則楚攻其南此所謂四分五裂之道也且夫諸侯之為從者將以安社稷尊主彊兵顯名也今從者一天下約為昆弟刑白馬以盟

洹

集解駟案音桓

水之上以相堅也而親昆弟同父母尚有爭

錢財而欲恃詐偽反覆蘇秦之餘謀其不可成亦明矣

大王不事秦秦下兵攻河外

索隱河之西即曲沃平周之邑也正義河外即卷衍

燕酸

據卷衍酸棗

集解駟案卷丘權反衍以善反索隱卷在河南衍地名正義卷衍屬鄭州

燕滑州胙城縣酸棗屬滑州皆黃河南岸地

劫衛取陽晉

正義故城在曹州乘氏縣西北三十

七里則趙不南趙不南而梁不北梁不北則從道絕從道

絕則大王之國欲毋危不可得也秦折韓而攻梁

索隱戰國

策折作扶也

韓怯於秦秦韓為一梁之亡可立而須也此臣

之所為大王患也為大王計莫如事秦事秦則楚韓必

不敢動無楚韓之患則大王高枕而臥

正義枕
針煇反

國必無

憂矣且夫秦之所欲弱者莫如楚而能弱楚者莫如梁

楚雖有富大之名而實空虛其卒雖多然而輕走易北

不能堅戰悉梁之兵南面而伐楚勝之必矣割楚而益

梁虧楚而適秦嫁禍安國此善事也大王不聽臣秦下

甲士而東伐雖欲事秦不可得矣且夫從人多奮辭而

少可信說一諸侯而成封侯是故天下之游談士莫不

日夜搯腕瞋目切齒以言從之便以說人主人主賢其辯而牽其說豈得無眩哉臣聞之積羽沉舟羣輕折軸衆口鑠金積毀銷骨故願大王審定計議且賜骸骨辟魏哀王於是乃倍從約而因儀請成於秦張儀歸復相秦三歲而魏復背秦為從秦攻魏取曲沃明年魏復事秦秦欲伐齊齊楚從親於是張儀往相楚楚懷王聞張儀來虛上舍而自館之曰此僻陋之國子何以教之儀說楚王曰大王誠能聽臣閉關絕約於齊臣請獻商於

之地六百里

索隱劉氏云商今之商州有古商城其西二百餘里有古於城

使秦女得

為大王箕箒之妾秦楚娶婦嫁女長為兄弟之國此北
弱齊而西益秦也計無便此者楚王大說而許之羣臣
皆賀陳軫獨弔之楚王怒曰寡人不興師發兵得六百
里地羣臣皆賀子獨弔何也陳軫對曰不然以臣觀之
商於之地不可得而齊秦合齊秦合則患必至矣楚王
曰有說乎陳軫對曰夫秦之所以重楚者以其有齊也
今閉關絕約於齊則楚孤秦奚貪夫孤國而與之商於

之地六百里張儀至秦必負王是北絕齊交西生患於

秦也而兩國之兵必俱至善為王計者不若陰合而陽

絕於齊使人隨張儀苟與吾地絕齊未晚也不與吾地

陰合謀計也楚王曰願陳子閉口毋復言以待寡人得

地乃以相印授張儀厚賂之於是遂閉關絕約於齊使

一將軍隨張儀張儀至秦詳失綏墮車不朝三月

正義詳音

羊

楚王聞之曰儀以寡人絕齊未甚邪乃使勇士至宋

借宋之符北罵齊王齊王大怒折節而下秦秦齊之交

合張儀乃朝謂楚使者曰臣有奉邑六里願以獻大王

左右楚使者曰臣受命於王以商於之地六百里不聞

六里還報楚王楚王大怒發兵而攻秦陳軫曰軫可發

口言乎攻之不如割地反以賂秦與之并兵而攻齊是

我出地於秦取償於齊也王國尚可存楚王不聽卒發

兵而使將軍屈匄擊秦秦齊共攻楚斬首八萬殺屈匄

遂取丹陽

集解徐廣曰在枝江

漢中之地

正義今梁州也在漢水北

楚又復益

發兵而襲秦至藍田大戰楚大敗於是楚割兩城以與

秦平秦要楚欲得黔中地

正義要音腰

欲以武關外易之

正義

即商於之地

楚王曰不願易地願得張儀而獻黔中地秦王

欲遣之口弗忍言張儀乃請行惠王曰彼楚王怒子之負以商於之地是且甘心於子張儀曰秦彊楚弱臣善靳尚尚得事楚夫人鄭袖袖所言皆從且臣奉王之節使楚楚何敢加誅假令誅臣而為秦得黔中之地臣之上願遂使楚楚懷王至則囚張儀將殺之靳尚謂鄭袖曰子亦知子之賤於王乎鄭袖曰何也靳尚曰秦王甚

愛張儀而不欲出之

索隱不字當作必時張儀為楚所因故必欲出之也正義秦王不欲

出張儀使楚若欲自行今秦欲以上庸地及美人贖儀

今將以上庸之地六縣

正義

今房州也賂楚以美人聘楚以宮中善歌謳者為媵楚王重

地尊秦秦女必貴而夫人斥矣不若為言而出之於是

鄭袖日夜言懷王曰人臣各為其主用今地未入秦秦

使張儀來至重王王未有禮而殺張儀秦必大怒攻楚

妾請子母俱遷江南母為秦所魚肉也懷王後悔赦張

儀厚禮之如故張儀既出未去聞蘇秦死

索隱此時當秦惠王之後

元十四年乃說楚王曰秦地半天下兵敵四國被險帶河四

塞以為固虎賁之士百餘萬車千乘騎萬匹積粟如丘

山法令既明士卒安難樂死主明以嚴將智以武雖無

出甲席卷常山之險必折天下之脊

索隱常山於天下在北有若人之背

脊也正義古之帝王多都河北河東故也

天下有後服者先亡且夫為從者

無以異於驅羣羊而攻猛虎虎之與羊不格明矣今王

不與猛虎而與羣羊臣竊以為大王之計過也凡天下

彊國非秦而楚非楚而秦兩國交爭其勢不兩立大王

不與秦秦下甲據宜陽韓之上地不通下河東取成臯

韓必入臣梁則從風而動秦攻楚之西韓梁攻其北社

稷安得毋危且夫從者聚羣弱而攻至彊不料敵而輕

戰國貧而數舉兵危亡之術也臣聞之兵不如者勿與

挑戰正義挑田鳥反粟不如者勿與持久夫從人飾辯虛辭高

主之節言其利不言其害卒有秦禍正義卒忽勿反無及為已

是故願大王之孰計之秦西有巴蜀大船積粟起於汶

山正義汶音泥浮江以下至楚三千餘里舫船載卒索隱舫音方謂

並兩船也一舫載五十人與三月之食下水而浮一日行三

百餘里里數雖多然而不費牛馬之力不至十日而距

扞關

集解徐廣曰巴即魚復有扞水扞關索隱扞關在楚之西界復音伏地理志巴即有魚復縣正義在

硤州巴山縣界

扞關驚則從境以東盡城守矣黔中巫郡非王

之有秦舉甲出武關南面而伐則北地絕

正義楚之北境斷絕

秦

兵之攻楚也危難在三月之內而楚待諸侯之救在半

歲之外此其勢不相及也夫待弱國之救忘彊秦之禍

此臣所以為大王患也大王嘗與吳人戰五戰而三勝

陣卒盡矣偏守新城存民苦矣

索隱偏音匹連反此之新城當在吳楚之間也

正義新攻得之城未詳所在

臣聞功大者易危而民敝者怨上夫守

易危之功而逆彊秦之心臣竊為大王危之且夫秦之

所以不出兵函谷十五年以攻齊趙者陰謀有合

集解徐廣

曰一作吞

天下之心楚嘗與秦構難戰於漢中

索隱其地在秦之山南楚

之西北漢水南之地名曰漢中也

楚人不勝列侯執珪死者七十餘人

遂亡漢中楚王大怒興兵襲秦戰於藍田此所謂兩虎

相搏者也

集解徐廣曰搏或音戰

夫秦楚相敝而韓魏以全制其

後計無危於此者矣願大王孰計之秦下甲攻衛陽晉

必大闕天下之匈

集解徐廣曰闕一作開索隱以常山為天下脊則此衛及陽晉當天下的

蓋其地是秦晉齊楚之交道也以言秦兵據陽晉是大闕天下匈則他國不得動也

大王悉起兵

以攻宋不至數月而宋可舉舉宋而東指則泗上十二

諸侯盡王之有也

索隱達近泗水之側當戰國之時有十二諸侯宋魯邾莒之比也

凡

天下而以信約從親相堅者蘇秦封武安君相燕即陰與燕王謀伐破齊而分其地乃詳有罪出走入齊齊王因受而相之居二年而覺齊王大怒車裂蘇秦於市夫

以一詐偽之蘇秦而欲經營天下混壹諸侯

索隱混本一作棍同

胡本反

其不可成亦明矣今秦與楚接境壤界固形親之

國也大王誠能聽臣臣請使秦太子入質於楚楚太子入質於秦請以秦女為大王箕箒之妾效萬室之都以為湯沐之邑長為昆弟之國終身無相攻伐臣以為計無便於此者於是楚王已得張儀而重出黔中地與秦欲許之屈原曰前大王見欺於張儀張儀至臣以為大王烹之今縱弗忍殺之又聽其邪說不可懷王曰許儀

而得黔中美利也後而倍之不可故卒許張儀與秦親
張儀去楚因遂之韓說韓王曰韓地險惡山居五穀所
生非菽而麥民之食大抵飯菽藿羹一歲不收民不饗
糟糠地不過九百里無二歲之食料大王之卒悉之不
過三十萬而廝徒負養在其中矣

索隱廝徒謂雜役之
賤者負養謂負擔以

給養公家
亦賤人也

除守徼亭鄣塞見卒不過二十萬而已矣秦

帶甲百餘萬車千乘騎萬匹虎賁之士跽跼科頭

集解
駟案

跽跼音徒俱跽踴也又云偏舉一足曰跽跼科頭謂
不著兜鍪入敵索隱跼又音幼戰國策作虎擊之士

貫

頤奮戰者至不可勝計

集解駢案言執戰奮怒而入陳也正義兩手捧頤而直入敵言

其勇也又有執戰者奮怒而趨入陣也

秦馬之良戎兵之衆探前跌後蹄

間三尋

索隱謂馬前足探向前後足跌於後跌音烏穴反跌謂後足挾地言馬之走勢疾也七尺曰尋

言馬走之疾前後蹄間一擲而過三尋也

騰者不可勝數山東之士被甲蒙

胄以會戰秦人捐甲徒跣以趨敵

索隱徒跣也跣袒也謂袒而見肉也

左

挈人頭右挾生虜夫秦卒與山東之卒猶孟賁之與怯夫以重力相壓猶烏獲之與嬰兒夫戰孟賁烏獲之士以攻不服之弱國無異垂千鈞之重於烏卵之上必無

幸矣夫羣臣諸侯不料地之寡而聽從人之甘言好辭

比周以相飾也皆奮曰聽吾計可以彊霸天下夫不顧

社稷之長利而聽須臾之說詿誤人主無過此者大王

不事秦秦下甲據宜陽斷韓之上地東取成臯滎陽則

鴻臺之宮桑林之苑

集解徐廣曰桑一作栗索隱此皆韓之宮苑亦見戰國策

非王

之有也夫塞成臯絕上地則王之國分矣先事秦則安

不事秦則危夫造禍而求其福報計淺而怨深逆秦而

順楚雖欲毋亡不可得也故為大王計莫如為

集解駢案于偽

反秦秦之所欲莫如弱楚而能弱楚者莫如韓非以韓能彊於楚也其地勢然也今王西面而事秦以攻楚秦王必喜夫攻楚以利其地轉禍而說秦計莫便於此者韓王聽儀計張儀歸報秦惠王封儀五邑號曰武信君使張儀東說齊湣王曰天下彊國無過齊者大臣父兄殷衆富樂然而為大王計者皆為一時之說不顧百世之利從人說大王者必曰齊西有彊趙南有韓與梁齊負海之國也地廣民衆兵彊士勇雖有百秦將無奈齊

何大王賢其說而不計其實夫從人朋黨比周莫不以

從為可臣聞之齊與魯三戰而魯三勝國以危亡隨其

後雖有戰勝之名而有亡國之實是何也齊大而魯小

也今秦之與齊也猶齊之與魯也秦趙戰於河漳之上

再戰而趙再勝秦戰於番吾之下再戰又勝秦

索隱番音盤又

音婆趙之邑也

四戰之後趙之亡卒數十萬邯鄲僅存雖有戰

勝之名而國已破矣是何也秦彊而趙弱今秦楚嫁女

娶婦為昆弟之國韓獻宜陽梁效河外

索隱河外河之南邑若曲沃平

同等也正義謂同華州地也

趙入朝澠

集解駟案綿善反

池割河間以事秦

索隱河漳之間邑割以事秦耳正義河間瀛州縣

大王不事秦秦驅韓梁攻齊

之南地悉趙兵渡清河指博關

正義博關在博州趙兵從貝州度黃河指博關

則深河南臨淄即墨危矣

臨菑即墨非王之有也國一日見攻雖欲

事秦不可得也是故願大王孰計之也齊王曰齊僻陋

隱居東海之上未嘗聞社稷之長利也乃許張儀張儀

去西說趙王曰敝邑秦王使使臣効愚計於大王大王

收率天下以賓秦秦兵不敢出函谷關十五年大王之

威行於山東敝邑恐懼懾伏繕甲厲兵飾車騎

正義飾音勅

習馳射力田積粟守四封之內愁居懾處不敢動搖唯

大王有意督過之也

索隱督者正其事而責之督過是深責其過也

今以大王

之力舉巴蜀并漢中包兩周遷九鼎守白馬之津秦雖

僻遠然而心忿忿怒之日久矣今秦有敝甲凋兵軍於

渑池願渡河踰漳據番吾會邯鄲之下願以甲子合戰

以正殷紂之事敬使使臣先聞左右凡大王之所信為

從者恃蘇秦蘇秦熒惑諸侯以是為非以非為是欲反

齊國而自令車裂於市夫天下之不可一亦明矣今楚與秦為昆弟之國而韓梁稱為東藩之臣齊獻魚鹽之地此斷趙之右臂也夫斷右臂而與人鬪失其黨而孤居求欲毋危豈可得乎今秦發三將軍其一軍塞午道

索隱此午道當在趙之東齊之西也午道地名也鄭玄云一縱一橫為午謂交道也

告齊使興師

渡清河軍於邯鄲之東一軍軍成臯驅韓梁軍於河外

正義河外謂鄭滑州北臨河

一軍軍於澠池約四國為一以攻趙趙

服必四分其地是故不敢匿意隱情先以聞於左右臣

竊為大王計莫如與秦王遇於澠池面相見而口相結

請案兵無攻願大王之定計趙王曰先王之時奉陽君

專權擅勢蔽欺先王獨擅綰事寡人居屬師傅不與國

謀計先王棄羣臣寡人年幼奉祀之日新心固竊疑焉

以為一從不事秦非國之長利也乃且願變心易慮割

地謝前過以事秦方將約車趨行

正義趙音趨

適聞使者之

明詔趙王許張儀張儀乃去北之燕說燕昭王曰大王

之所親莫如趙昔趙襄子嘗以其姊為代王妻欲并代

約與代王遇於句注之塞

正義句注山在代州也上音勾

乃令工人作

為金斗長其尾

索隱斗音主凡方者為斗若安長柄則名為料音主尾即斗之柄其形若刀者

是令可以擊人與代王飲陰告厨人曰即酒酣樂進熱

啜

索隱音昌悅反謂熱而啜之是羹也下云厨人進斟斟謂羹汁故名汁曰斟左氏傳公羊傳云羊羹不斟

是反斗以擊之

正義反斗即倒柄擊也

於是酒酣樂進熱啜厨人

進斟因反斗以擊代王殺之王腦塗地其姊聞之因摩

笄以自刺故至今有摩笄之山

集解駟案笄婦人之首飾如今象牙簪正義笄

今簪也摩笄山在蔚州飛狐縣東北百五十里

代王之亡天下莫不聞夫趙王

之狼戾無親大王之所明見且以趙王為可親乎趙興
兵攻燕再圍燕都而劫大大王大王割十城以謝今趙王
已入朝澠池効河間以事秦今大王不事秦秦下甲雲
中九原驅趙而攻燕則易水長城

正義並在
易州界

非大王之

有也且今時趙之於秦猶郡縣也不敢妄舉師以攻伐
今王事秦秦王必喜趙不敢妄動是西有彊秦之援而
南無齊趙之患是故願大王孰計之燕王曰寡人蠻夷
僻處雖大男子裁

集解駟
案音在

如嬰兒言不足以采正計今

上客幸赦之請西面而事秦獻恒山之尾五城

索隱尾猶末也

謂獻恒山之末五城以與秦

燕王聽儀儀歸報未至咸陽而秦惠王

卒武王立武王自為太子時不說張儀及即位羣臣多
讒張儀曰無信左右賣國以取容秦必復用之恐為天
下笑諸侯聞張儀有卻武王皆畔衡復合從秦武王元
年羣臣日夜惡張儀未已而齊讓又至張儀懼誅乃因
謂秦武王曰儀有愚計願効之王曰奈何對曰為秦社
稷計者東方有大變然後王可以多割得地也今聞齊

王甚憎儀儀之所在必興師伐之故儀願乞其不肖之
身之梁齊必興師而伐梁梁齊之兵連於城下而不能
相去王以其間伐韓入三川出兵函谷而毋伐以臨周
祭器必出

索隱凡王者大祭祀必陳設文物
軒車鼎器等同謂此為祭器也

挾天子按

圖籍此王業也秦王以為然乃具革車三十乘入儀之
梁齊果興師伐之梁哀王恐張儀曰王勿患也請令罷
齊兵乃使其舍人馮喜之楚

索隱此與戰國策
同舊本作燕誤也

借使之

齊謂齊王曰王甚憎張儀雖然亦厚矣王之託儀於秦

也齊王曰寡人憎儀儀之所在必興師伐之何以託儀
對曰是乃王之託儀也夫儀之出也固與秦王約曰為
王計者東方有大變然後王可以多割得地今齊王甚
憎儀儀之所在必興師伐之故儀願乞其不肖之身之
梁齊必興師伐之齊梁之兵連於城下而不能相去王
以其間伐韓入三川出兵函谷而無伐以臨周祭器必
出挾天子案圖籍此王業也秦王以為然故具革車三
十乘而入之梁也今儀入梁王果伐之是王內罷國而

外伐與國

索隱謂齊之伐梁也梁之與齊先相許與約從為鄰故云與國也

廣鄰敵以

內自臨而信儀於秦王也此臣之所謂託儀也齊王曰

善乃使解兵張儀相魏一歲卒於魏也

索隱年表云張儀以安王十年

卒紀年云梁哀

王九年五月卒

陳軫者游說之士與張儀俱事秦惠王皆貴重爭寵張儀惡陳軫於秦王曰軫重幣輕使秦楚之間將為國交也今楚不加善於秦而善軫者軫自為厚而為王薄也且軫欲去秦而之楚王胡不聽乎王謂陳軫曰吾聞子

欲去秦之楚有之乎軫曰然王曰儀之言果信矣軾曰
非獨儀知之也行道之士盡知之矣昔子胥忠於其君
而天子爭以為臣曾參考於其親而天下願以為子故
賣僕妾不出閭巷而售者良僕妾也出婦嫁於鄉曲者
良婦也今軾不忠其君楚亦何以軾為忠乎忠且見棄
軾不之楚何歸乎王以其言為然遂善待之居秦期年
秦惠王終相張儀而陳軾奔楚楚未之重也而使陳軾
使於秦過梁欲見犀首犀首謝弗見軾曰吾為事來公

不見軫軫將行不得待

索隱軫語犀首言我故來欲有教汝之事何不相見

異日

犀首見之陳軫曰公何好飲也犀首曰無事也曰吾請

令公饜事可乎

索隱饜一飽反饜者飽也謂欲令其多事

曰奈何曰田需約

諸侯從親

索隱需時為魏相

楚王疑之未信也公謂於王曰臣

與燕趙之王有故數使人來曰無事何不相見願謁行

於王王雖許公公請毋多車以車三十乘可陳之於庭

明言之燕趙燕趙客聞之馳車告其王使人迎犀首楚

王聞之大怒曰田需與寡人約而犀首之燕趙是欺我

也怒而不聽其事齊聞犀首之北使人以事委焉犀首

遂行三國相事皆斷於犀首軫遂至秦韓魏相攻朞年

不解秦惠王欲救之問於左右左右或曰救之便或曰

勿救便惠王未能為之決陳軫適至秦惠王曰子去寡

人之楚亦思寡人不陳軫對曰王聞夫越人莊烏乎王

曰不聞曰越人莊烏仕楚執珪有頃而病楚王曰烏故

越之鄙細人也今仕楚執珪貴富矣亦思越不中謝

索隱

謂侍御之官也

對曰凡人之思故在其病也彼思越則越聲不

思越則楚聲使人往聽之猶尚越聲也今臣雖棄逐之

楚豈能無秦聲哉惠王曰善今韓魏相攻暮年不解或

謂寡人救之便或曰勿救便

索隱此張儀等計策

寡人不能決願

子為子主計之

索隱子指陳軫也子主謂楚王也

餘為寡人計之陳軫

對曰亦嘗有以夫卞莊子刺虎聞於王者乎

索隱戰國策作館莊

子館謂逆旅舍其人字莊子或作卞莊子

莊子欲刺虎館豎子止之曰兩虎

方且食牛食甘必爭爭則必鬪鬪則大者傷小者死從

傷而刺之一舉必有雙虎之名卞莊子以為然立須之

有頃兩虎果鬪大者傷小者死莊子從傷者而刺之一
舉果有雙虎之功今韓魏相攻暮年不解是必大國傷
小國亡從傷而伐之一舉必有兩實此猶莊子刺虎之
類也臣主與王何異也秦惠王以言我主與王俱宜侍
韓魏之斃而擊之亦無以異也惠王曰善卒弗救大國果傷小國亡秦

興兵而伐大尅之此陳軫之計也

犀首者魏之陰晉人也

集解司馬彪曰犀首魏官名若今虎牙將軍

名衍姓

公孫氏與張儀不善張儀為秦之魏魏王相張儀犀首

弗利故令人謂韓公叔曰張儀已合秦魏矣其言曰

正義正

此張儀合秦魏之辭

魏攻南陽秦攻三川魏王所以貴張子者欲

得韓地也且韓之南陽已舉矣子何不少委焉以為衍

功則秦魏之交可錯矣

索隱錯音措錯停止也

然則魏必圖秦而

棄儀收韓而相衍公叔以為便因委之犀首以為功果

相魏張儀去

集解徐廣曰復相秦

義渠君朝於魏犀首聞張儀復

相秦害之犀首乃謂義渠君曰道遠不得復過

索隱音戈言義

渠道遠今日已後不復得更過相見也

請謁事情

索隱謂欲以秦之緩急告語之也

曰中

國無事

索隱謂山東諸侯齊魏之六國正義中國謂關東六國無事不共攻秦

秦得燒掇

焚杆

集解徐廣曰一孤切索隱掇音都活反謂焚燒而侵掠也焚杆音煩烏謂焚蹂而牽掣也戰國策云

且燒燔獲君之國是說其事也

君之國有事

索隱謂山東諸國共伐秦也

秦將輕使

重幣事君之國

索隱謂秦求親義渠君也正義有事謂六國攻秦秦苦被攻伐則必輕使重幣

事義渠國欲令相助犀首此言者令義渠君勿援秦也

其後五國伐秦

索隱按表秦惠王後

元七年楚魏齊韓趙五國共攻秦是其事也

會陳軫謂秦王曰義渠君者蠻

夷之賢君也不如賂之以撫其志秦王曰善乃以文繡

千純

索隱凡絲綿布帛等一段謂一純音屯

婦女百人遺義渠君義渠君

致羣臣而謀曰此公孫衍所謂邪

索隱謂上文犀首云君之國有事秦將輕

使重幣事君之國故云公孫衍之所謂因起兵襲秦以傷張儀也

乃起兵襲秦大敗秦

人李伯之下

索隱謂義渠破秦軍於李伯之下則李伯人名或邑號戰國策伯作帛

張儀

已卒之後犀首入相秦嘗佩五國之相印為約長

索隱犀首

後相五國或從或橫常為約長

太史公曰三晉多權變之士夫言從衡彊秦者大抵皆

三晉之人也夫張儀之行事甚於蘇秦然世惡蘇秦者

以其先死而儀振暴其短以扶其說

索隱暴音步卜反振謂振揚而暴露

其短扶謂說彼之非成我之是扶會已之說辭也

成其衡道

索隱張儀說六國使連衡而事秦故

云成其衡道然山東地形從長蘇秦相六國令從親而賓秦也關西地形衡長張儀相六國令破其從而連秦

之衡故蘇為合從張為連衡也

要之此兩人真傾危之士哉

索隱述贊曰儀未遭時頻被困辱及相秦惠先韓後蜀連衡齊魏傾危誑惑陳軫挾權辱首騁欲如何三

晉繼有斯德

史記卷七十

史記卷七十考證

張儀列傳從鄭至梁二百餘里○

臣照

按戰國策云從

鄭至梁不過百里從陳至梁二百餘里通鑑地理通
釋曰按九域志鄭州至東京一百四十里陳州至東
京二百四十五里當以國策為正

則從境以東○戰國策作從竟陵以東

五戰而三勝○徐孚遠曰越滅吳楚滅越懷王時吳之
屬楚久矣安得與吳人五戰此言誤也

且夫秦之所以不出兵函谷十五年以攻齊趙者○戰國策補注云按此前二年五年六年皆有攻趙之事而攻齊則無之若云不攻齊則猶可通也

楚王大怒○徐孚遠曰當言大王今言楚王亦誤也

熱啜索隱謂熱而啜之也下云厨人進斟斟謂羹汁故名汁曰斟左氏傳公羊傳云羊羹不斟是也○臣照

按左傳云羊羹不偏羊斟是華元之御此誤引之公羊傳又無此語

梁哀王恐○春秋後語作魏襄王

館豎子止之○國策作管與止之

臣主與王何異也索隱臣主謂軫之主楚王也王秦惠
王以言我主與王俱宜侍韓魏之斃而擊之亦無以
異也○徐孚遠曰軫言已之為秦王計不後于楚王
也索隱言秦楚俱宜侍二國之弊此說非也

其後五國伐秦○戰國策補注曰按秦紀書韓趙魏燕
齊帥匈奴伐秦年表韓魏趙楚燕五國伐秦不勝楚

世家書蘇秦約從六國共攻秦楚懷王為從長至函
谷關秦擊之六國皆引歸齊獨後互有不同

史記卷七十考證

史記卷七十一

漢 太 史 令司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

樗里子甘茂列傳第十一

樗里子者名疾秦惠王之弟也

索隱樗木名也音攄高誘曰其里有樗樹故曰

樗里然疾居渭南陰鄉之樗里故號曰樗里子又紀年則謂之褚里疾

與惠王異母母韓

女也樗里子滑稽多智

索隱滑稽音骨稽音雞鄒誕解云滑稽也稽同也謂辯捷之人言

非若是言是若非謂能亂同異也一云滑稽酒器可轉注吐酒不已以言俳優之人出口成章詞不窮竭如滑稽之吐酒不已也正義滑稽讀為渥水流自出稽計也言其智計宣吐如泉流出無盡故揚雄酒賦云鴟夷滑稽腹大如壺是也顏師古曰滑稽轉利之稱也滑稽也稽疑也其變無留也一說稽考也言其滑稽亂不可考較

秦人號曰智囊秦惠王八年爵樗里子右更

索隱右更秦第十四

爵使將而伐曲沃

正義故城在陝州縣西南三十二里

盡出其人

索隱年表云十

一年拔魏曲沃歸其人秦本紀惠文王後元八年五國共圍秦使庶長疾與戰脩魚斬首八萬十一年樗里疾

攻魏焦降之則焦與曲沃同在十一年拔明矣而傳云八年拔之不同王劭按本紀年表及此傳三處記秦伐國並不同又與紀年不合今殆不可參考也

取其城地入秦秦惠王二十五

年使樗里子為將伐趙虜趙將軍莊豹拔蘭

正義蘭縣在石州

明年助魏章攻楚敗楚將屈丐取漢中地秦封樗里子

號為嚴君

索隱按嚴君是爵邑之號當是封之嚴道也

秦惠王卒太子武王

立逐張儀魏章而以樗里子甘茂為左右丞相秦使甘

茂攻韓拔宜陽使樗里子以車百乘入周周以卒迎之

意甚敬楚王怒讓周以其重秦客游騰為周說楚王曰

索隱游姓騰名智伯之伐仇猶

集解許慎曰仇猶夷狄之國索隱高誘注戰國策以仇酋為公

由韓子作仇由地理志臨淮有仇酋縣也正義括地志云并州孟縣外城俗名原仇山亦名仇猶夷狄之國也韓子云智伯欲伐仇猶國道險難不通乃鑄大鍾遺之載以廣車仇猶大悅除塗內之赤章蔓支諫曰不可此小所以事大而今大以遺小卒必隨不可不聽遂遺之廣內之蔓支因斷轂而駛至十九日而仇猶亡也

車

集解駟案戰國策曰智伯欲伐仇猶遺之大鍾載以廣車周禮曰廣車之萃鄭玄曰廣車橫陳之車

因

隨之以兵仇猶遂亡何則無備故也齊桓公伐蔡號曰

誅楚其實襲蔡今秦虎狼之國使樗里子以車百乘入

周周以仇猶蔡觀焉故使長戟居前彊弩在後名曰衛

疾

正義防衛
樗里子

而實囚之且夫周豈能無憂其社稷哉恐

一旦亡國以憂大王楚王乃悅秦武王卒昭王立樗里

子又益尊重昭王元年樗里子將伐蒲

索隱紀年云褚里疾圍蒲不克

而秦惠王薨事與此合正義蒲故城在
滑州匡城縣北十五里即子路作宰地

蒲守恐請胡衍

索隱胡衍
人姓名也

胡衍為蒲謂樗里子曰公之攻蒲為秦乎為

魏乎為魏則善矣為秦則不為賴矣

集解駟案
賴利也

夫衛之

所以為衛者以蒲也

正義蒲是衛
國之鄣衛

今伐蒲入於魏衛必

折而從之

索隱戰國策云今蒲入於秦衛
必折而入於魏與此文相反

魏亡西河之

外

正義謂同
華等州

而無以取者兵弱也今并衛於魏魏必彊

魏彊之日西河之外必危矣且秦王將觀公之事害秦
而利魏王必罪公樗里子曰奈何胡衍曰公釋蒲勿攻
臣試為公入言之以德衛君樗里子曰善胡衍入蒲謂
其守曰樗里子知蒲之病矣其言曰必拔蒲衍能令釋
蒲勿攻蒲守恐因再拜曰願以請因效金三百斤曰秦
兵苟退請必言子於衛君使子為南面故胡衍受金於
蒲以自貴於衛於是遂解蒲而去還擊皮氏

正義故城
在絳州龍

門縣西百四十步魏邑

皮氏未降又去昭王七年樗里子卒葬於

渭南章臺之東

索隱按黃圖在漢長安故城西

曰後百歲是當有天子

之宮夾我墓樗里子疾室在於昭王廟西渭南陰鄉樗

里故俗謂之樗里子至漢興長樂宮在其東未央宮在

其西

正義漢長樂宮在長安縣西北十五里未央在縣西北十四里皆在長安故城中也

武庫正

直其墓

索隱直如字讀直猶當也

秦人諺曰力則任鄙智則樗里

甘茂者下蔡人也

索隱地理志下蔡縣屬汝南也正義今潁州縣即州來國

事下蔡

史舉先生

索隱戰國策及韓子皆云史舉上蔡監門者

學百家之說因張儀

樗里子而求見秦惠王王見而說之使將而佐魏章略

定漢中地惠王卒武王立張儀魏章去東之魏蜀侯煇

相壯反

索隱煇音暉又音胡昆反秦之公子封蜀也華陽國志作暉壯音側狀反姓陳也

秦使

甘茂定蜀還而以甘茂為左丞相以樗里子為右丞相

秦武王三年謂甘茂曰寡人欲容車通三川以窺周室

而寡人死不朽矣甘茂曰請之魏約以伐韓而令向壽

輔行

正義鉤受二音八姓名

甘茂至謂向壽曰子歸言之於王曰

魏聽臣然願王勿伐事成盡以為子功向壽歸以告

王王迎甘茂於息壤

索隱山海經啓筮云昔伯鯀竊帝之息壤以堙洪水或是此也正義

秦甘茂至王問其故對曰宜陽大縣也上黨南陽積之

久矣

索隱上黨南陽並積貯日久正義韓之北三郡積貯在河南宜陽縣之日久矣

名曰縣其

實郡也今王倍數險行千里攻之難

正義謂函谷及三峭五谷

昔曾

參之處費魯人有與曾參同姓名者殺人人告其母曰

曾參殺人其母織自若也頃之一人又告之曰曾參殺

人其母尚織自若也頃又一人告之曰曾參殺人其母

投杼下機踰牆而走夫以曾參之賢與其母信之也三

人疑之其母懼焉今臣之賢不若曾參王之信臣又不

如曾參之母信曾參也疑臣者非特三人臣恐大王之

投杼也始張儀西并巴蜀之地北開西河之外南取上

庸天下不以多張子而以賢先王魏文侯令樂羊將而

伐中山三年而拔之樂羊返而論功文侯示之謗書一

篋樂羊再拜稽首曰此非臣之功也主君之力也今臣

羈旅之臣也禱里子公孫爽

索隱戰國策作公孫衍正義音釋

二人者

挾韓而議之王必聽之是王欺魏王而臣受公仲侈

集解

徐廣曰一作馮之怨也王曰寡人不聽也請與子盟卒使丞相

甘茂將兵伐宜陽五月而不拔樗里子公孫奭果爭之

武王召甘茂欲罷兵甘茂曰息壤在彼正義甘茂歸至息壤與秦王盟

恐後樗里子公孫奭伐韓今二子果爭之武王曰有之王召茂欲罷兵故甘茂云息壤在彼邑也

因大悉起兵使甘茂擊之斬首六萬遂拔宜陽韓襄王

使公仲侈入謝與秦平武王竟至周而卒於周其弟立

為昭王索隱趙系家昭王名稷系本云名側王母宣太后楚女也楚懷王

怨前秦敗楚於丹陽而韓不救乃以兵圍韓雍氏索隱秦惠

王二十六年楚圍雍氏至昭王七年又圍雍氏韓求救於秦是再圍也劉氏云此是前圍雍氏當赧王之七年戰國策及紀年與此並不同正義

故城在洛州洛陽縣東北二十里韓使公仲侈告急於

秦秦昭王新立太后楚人不肯救公仲因甘茂為韓言於秦昭王曰公仲方有得秦救故敢扞楚也今雍氏圍秦師不下穀公仲且仰首而不朝公叔且以國南合於楚楚韓為一魏氏不敢不聽然則伐秦之形成矣不識坐而待伐孰與伐人之利秦王曰善乃下師於穀以救韓楚兵去秦使向壽平宜陽而使樗里子甘茂伐魏

皮氏向壽者宣太后外族也而與昭王少相長故任用

向壽如楚

集解徐廣曰
如一作和

楚聞秦之貴向壽而厚事向壽

向壽為秦守宜陽將以伐韓韓公仲使蘇代謂向壽曰

禽困覆車

集解駟案譬禽獸得困
急猶能抵觸傾覆人車

公破韓辱公仲公仲

收國復事秦自以為必可以封

正義公仲自以為必可得秦封

今公與

楚解口地

索隱解口秦地名近韓今將與楚也正義上
紀買反公向壽也解口猶開口得言向壽於

秦開口則楚人
必得封地也

封小令尹以杜陽

索隱又封楚之小令
尹以杜陽杜陽秦之

地今以封楚令尹
是秦楚相合也

秦楚合復攻韓韓必亡韓亡公仲且

躬率其私徒以闕

集解駟案烏合反

於秦

正義公仲恐韓亡欲將私徒往宜陽闕向

壽也願公熟慮之也向壽曰吾合秦楚非以當韓也子為

壽謂之公仲

正義子蘇代也向壽恐令蘇代謂報公仲云秦韓交可合

曰秦韓之交

可合也蘇代對曰願有謂於公

正義公向壽也言向壽亦黨於楚與公孫奭甘

茂黨韓魏同也

人曰貴其所以貴者貴王之愛習公也不如公

孫奭其智能公也不如甘茂今二人者皆不得親於秦

事而公獨與王主斷於國者何彼有以失之也

索隱彼言公孫

奭及甘茂也有以失之謂不見委任情有所失正義言秦王雖愛習公孫奭甘茂秦事不親委者謂黨韓魏也

今國事獨與向壽主斷者不知壽黨於楚以事秦王有以失之也

公孫奭黨於韓而甘

茂黨於魏故王不信也今秦楚爭彊而公黨於楚是與

公孫奭甘茂同道也公何以異之

正義蘇氏云向壽與公孫奭甘茂皆有黨

言無異也一云改異黨楚之意

人皆言楚之善變也而公必亡之是自

為責也

正義楚善變改不可信若變改向壽必亡敗之自為責

公不如與王謀其

變也善韓以備楚如此則無患矣

正義令秦親韓而備楚之變改則向壽無

患韓氏必先以國從公孫奭而後委國於甘茂韓公之

讐也

正義韓氏必先委二人故韓為向壽之讐

今公言善韓以備楚是外舉

不辟讐也向壽曰然吾甚欲韓合對曰甘茂許公仲以

武遂

集解徐廣曰秦昭王元年予韓武遂

反宜陽之民

正義武遂宜陽本韓邑也秦伐取之

今欲還韓令其民得反歸居之

今公徒收之甚難

正義蘇代言甘茂許公仲以武遂又歸宜

陽之民今向壽徒擬收之甚難事也

向壽曰然則奈何武遂終不可得也

對曰公奚不以秦為韓求潁川於楚

正義潁川許州也楚侵韓潁川蘇代

令向壽以秦威重為韓就楚求索潁川是親向壽

此韓之寄地也公求而得之

是令行於楚而以其地德韓也公求而不得是韓楚之

怨不解

集解駰案已買反

而交走秦也

索隱韓楚怨不解二國交走向秦也

秦楚

爭彊而公徐過楚以收韓此利於秦

集解徐廣曰過一作適正義若二國

皆事秦公則漸說楚之過失以收韓此利於秦也

向壽曰奈何對曰此善事也

甘茂欲以魏取齊公孫奭欲以韓取齊今公取宜陽以

為功收楚韓以安之而誅齊魏之罪

正義言公孫奭甘茂皆欲以秦挾韓

魏而取齊今向壽取宜陽為功收楚韓安以事秦而責齊魏之罪是公孫奭甘茂不得同合韓魏於秦以伐齊

也是以公孫奭甘茂無事也甘茂竟言秦昭王以武遂

復歸之韓

正義年表云秦昭王元年予韓武遂也

向壽公孫奭爭之不能

得向壽公孫奭由此怨讒甘茂茂懼輟伐魏蒲阪亡去

集解徐廣曰昭王元
年擊魏皮氏未拔去
樗里子與魏講罷兵

索隱鄒氏云
講讀曰媾媾

和猶甘茂之亡秦奔齊逢蘇代代為齊使於秦甘茂曰臣

得罪於秦懼而遯逃無所容跡臣聞貧人女與富人女
會績貧人女曰我無以買燭而子之燭光幸有餘子可
分我餘光無損子明而得一斯便焉今臣困而君方使
秦而當路矣茂之妻子在焉願君以餘光振之蘇代許
諾遂致使於秦已因說秦王曰甘茂非常士也其居於
秦累世重矣自殽塞及至鬼谷

集解徐廣曰在陽城索
隱鬼谷在關內雲陽是

也正義三般在洛
州永寧縣西北

其地形險易皆明知之彼以齊約韓

魏反以圖秦非秦之利也秦王曰然則奈何蘇代曰王

不若重其贄厚其祿以迎之使彼來則置之鬼谷

正義
劉伯

莊云此鬼谷關內雲陽非陽城者也
按陽城鬼谷時屬韓秦不得言置之

終身勿出秦王曰

善即賜之上卿以相印迎之於齊甘茂不往蘇代謂齊

湣王曰夫甘茂賢人也今秦賜之上卿以相印迎之甘

茂德王之賜好為王臣故辭而不往今王何以禮之齊

王曰善即位之上卿而處之

索隱處
猶留也

秦因復甘茂之家

正義復
音福

以市於齊齊使甘茂於楚楚懷王新與秦合婚

而驩

集解徐廣曰昭王二年時迎婦於楚

而秦聞甘茂在楚使人謂楚王

曰願送甘茂於秦楚王問於范蠡

集解徐廣曰一作蠡索隱休緣反又音休

軟反戰國策一作蠡字

曰寡人欲置相於秦孰可對曰臣不足以

識之楚王曰寡人欲相甘茂可乎對曰不可夫史舉下

蔡之監門也大不為事君小不為家室以苟賤不廉聞

於世甘茂事之順焉故惠王之明武王之察張儀之辯

而甘茂事之取十官而無罪茂誠賢者也然不可相於

秦夫秦之有賢相非楚國之利也且王前嘗用召滑於

越

集解徐廣曰滑一作涓

而內行章義之難

索隱召滑內心猜詐外則佯章恩義而卒

包藏禍心構難於楚戰國策云內句章昧之難也

越國亂故楚南塞厲門

集解徐廣

曰一作瀨胡正義劉伯莊云厲門度嶺南之要路

而郡江東

正義吳越之城皆為楚之都邑

計

王之功所以能如此者越國亂而楚治也今王知用諸

越而忘用諸秦臣以王為鉅過矣然則王若欲置相於

秦則莫若向壽者可夫向壽之於秦王親也少與之同

衣長與之同車以聽事王必相向壽於秦則楚國之利

也於是使使請秦相向壽於秦秦卒相向壽而甘茂竟不得復入秦卒於魏甘茂有孫曰甘羅

甘羅者甘茂孫也茂既死後甘羅年十二事秦相文信

侯呂不韋

索隱戰國策甘羅事呂不韋為庶子

秦始皇帝使剛成君蔡澤

於燕三年而燕王喜使太子丹入質於秦秦使張唐往相燕欲與燕共伐趙以廣河間之地張唐謂文信侯曰臣嘗為秦昭王伐趙趙怨臣曰得唐者與百里之地今之燕必經趙臣不可以行文信侯不快未有以彊也甘

羅曰君侯何不快之甚也文信侯曰吾令剛成君蔡澤

事燕三年燕太子丹已入質矣吾自請張卿相燕而不

肯行

索隱即張唐也卿字也

甘羅曰臣請行之文信侯叱曰去我

身自請之而不肯女焉能行之

正義女音汝馬乙連反

甘羅曰夫

項橐生七歲為孔子師

索隱橐音託尊其道故云項橐

今臣生十二歲

於茲矣君其試臣何遽叱乎於是甘羅見張卿曰卿之

功孰與武安君卿曰武安君南挫彊楚北威燕趙戰勝

攻取破城墮邑不知其數臣之功不如也甘羅曰應侯

之用於秦也孰與文信侯專

索隱應侯范雎也

張卿曰應侯不

如文信侯專甘羅曰卿明知其不如文信侯專與曰知之甘羅曰應侯欲攻趙武安君難之去咸陽七里而立死於杜郵今文信侯自請卿相燕而不肯行臣不知卿所死處矣張唐曰請因孺子行令裝治行行有日甘羅謂文信侯曰借臣車五乘請為張唐先報趙文信侯乃入言之於始皇曰昔甘茂之孫甘羅年少耳然名家之子孫諸侯皆聞之今者張唐欲稱疾不肯行甘羅說而

行之今願先報趙請許遣之始皇召見使甘羅於趙趙
襄王郊迎甘羅甘羅說趙王曰王聞燕太子丹入質秦
歟曰聞之曰聞張唐相燕歟曰聞之燕太子丹入秦者
燕不欺秦也張唐相燕者秦不欺燕也燕秦不相欺者
伐趙危矣燕秦不相欺無異故欲攻趙而廣河間王不
如齊臣五城以廣河間索隱齊音側奚反一音費並謂割五城與臣也請歸燕
太子與彊趙攻弱燕趙王立自割五城以廣河間秦歸
燕太子趙攻燕得上谷三十城

索隱戰國策云得三十縣正義上谷今媯州

也在幽州西北

令秦有十一

索隱謂以十一城與秦也

甘羅還報秦乃封甘

羅以為上卿復以始甘茂田宅賜之

太史公曰樗里子以骨肉重固其理而秦人稱其智故

頗采焉甘茂起下蔡閭閻顯名諸侯重彊齊楚

集解徐廣曰恐

或疑此當云見重彊齊誤脫一字正義甘茂為彊齊楚所重

甘羅年少然出一奇計

聲稱後世雖非篤行之君子然亦戰國之策士也方秦之彊時天下尤趨謀詐哉

索隱述贊曰嚴君名疾厥號智囊既親且重稱兵外攘甘茂並相初佐魏章始推向壽乃攻宜陽甘羅妙

歲卒起
張唐

史記卷七十一

史記卷七十一考證

樗里子甘茂列傳虜趙將軍莊豹○秦本紀作虜趙將
莊

今伐蒲入於魏衛必折而從之○顧炎武曰此文誤當
依索隱所引戰國策文為正

蜀侯煇相壯反○

臣照

按華陽國志秦滅蜀封公子通

為蜀侯以陳壯為相壯反殺蜀侯通秦誅壯封子煇
為蜀侯煇為後母所譖自殺與此異

不如公孫奭○奭戰國策作郝

則置之鬼谷○

臣照

按戰國策作槐谷補注曰春秋後

語注槐里之谷今京兆始平之地與此異

史記卷七十一考證

史記卷七十二

漢 太 史 令司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

穰侯列傳第十二

穰侯魏冉者秦昭王母宣太后弟也

索隱宣太后之異父長弟也姓魏名

冉封之穰地理志穰縣在南陽宣太
后者惠王之妃姓羊氏曰羊八子也其先楚人姓羊氏

正義羊
亡爾反秦武王卒無子立其弟為昭王昭王母故號為

羊八子及昭王即位羊八子號為宣太后宣太后非武

王母武王母號曰惠文后先武王死

索隱秦本紀云昭王二年庶長壯與

大臣公子為逆皆誅及惠文后皆不得良死又按
紀年云秦內亂殺其太后及公子雍公子壯是也宣太

后二弟其異父長弟曰穰侯姓魏氏名冉同父弟曰羊

戎為華陽君

索隱華陽韓地後屬秦羊戎後又號新城君正義司馬彪云華陽亭名在洛州密縣

又故華城在鄭州管
城縣南三十里即此

而昭王同母弟曰高陵君

索隱涇

陽君索隱名悝而魏冉最賢自惠王武王時任職用事武王

卒諸弟爭立唯魏冉力為能立昭王昭王即位以冉為

將軍衛咸陽誅季君之亂

集解徐廣曰年表曰季君為亂誅本紀曰庶長壯與大臣

公子謀反伏誅索隱按季君即公子壯僭立而號曰季君穰侯力能立昭王為將軍衛咸陽誅季君及惠文后故本紀言伏誅又云及惠文后皆不得良死蓋謂惠文后時黨公子壯欲立之及壯誅而太后憂死故云不得良死亦史諱之也又逐武王后出之魏亦事勢然耳而逐武王后出之魏昭王諸

兄弟不善者皆滅之威振秦國昭王少宣太后自治任魏冉為政昭王七年穰里子死而使涇陽君質於齊趙

人樓緩來相秦趙不利乃使仇液之秦

索隱戰國策作仇郝蓋是一人

而記別也正義音亦姓名

請以魏冉為秦相仇液將行其客宋公

索隱

戰國策作宋交

謂液曰秦不聽公樓緩必怨公公不若謂樓緩

曰請為公母急秦秦王見趙請相魏冉之不急且不聽

公公言而事不成以德樓子事成魏冉故德公矣於是

仇液從之而秦果免樓緩而魏冉相秦欲誅呂禮禮出

奔齊昭王十四年魏冉舉白起使代向壽將而攻韓魏

敗之伊闕斬首二十四萬虜魏將公孫喜明年又取楚

之宛葉魏冉謝病免相以客卿壽燭為相其明年燭免

復相冉乃封魏冉於穰復益封陶

集解徐廣曰一作陰索隱陶即定陶也徐

廣云作陰陶陰字本易惑也王劭案定陶見有魏冉冢作陰誤也

號曰穰侯穰侯封四

歲為秦將攻魏魏獻河東方四百里拔魏之河內取城

大小六十餘昭王十九年秦稱西帝齊稱東帝月餘呂

禮來而齊秦各復歸帝為王魏冉復相秦六歲而免免

二歲復相秦四歲而使白起拔楚之郢秦置南郡乃封

白起為武安君白起者穰侯之所任舉也相善於是穰

侯之富富於王室昭王三十二年穰侯為相國將兵攻

魏走芒卯

集解駟案上莫卯反下陌鮑反

入北宅

集解徐廣曰魏惠王五年與韓會宅陽正

義竹書云宅陽一名北宅括地志云宅陽故城在鄭州滎陽縣西南十七里

遂圍大梁梁大

夫須賈說穰侯曰臣聞魏之長吏謂魏王曰昔梁惠王

伐趙戰勝三梁

集解徐廣曰田完世家云魏伐趙趙不利戰於南梁索隱三梁即南梁也

拔

邯鄲趙氏不割而邯鄲復歸齊人攻衛拔故國殺子良

索隱衛之故國蓋楚丘也下文故地亦同謂楚丘也戰國策衛字皆作燕子良作子之恐非也衛人不

割而故地復反衛趙之所以國全兵勁而地不并於諸

侯者以其能忍難而重出地也宋中山數伐割地而國

隨以亡臣以為衛趙可法而宋中山可為戒也秦貪戾

之國也而母親蠶食魏氏又盡晉國

索隱河西河東河內並是魏地即故

晉國今言秦蠶食魏氏盡晉國之地也

戰勝暴子

集解徐廣曰韓將暴鳶

割八縣地

未畢入兵復出矣夫秦何厭之有哉今又走芒卯入北

宅此非敢攻梁也且劫王以求多割地王必勿聽也今

王背楚趙而講秦

索隱講和也

楚趙怒而去王與王爭事秦

秦必受之秦挾楚趙之兵以復攻梁則國求無亡不可

得也願王之必無講也王若欲講少割而有質不然必

見欺

索隱謂與秦欲講少割地而求秦質子恐不然必被秦欺也

此臣之所聞於魏

也

索隱須賈說穰侯言魏人謂梁王若少割而求質必是欺我即聞魏見欺於秦也

願君王之

以是慮事也周書曰惟命不于常此言幸之不可數也

夫戰勝暴子割八縣此非兵力之精也又非計之工也

天幸為多矣今又走芒卯入北宅以攻大梁是以天幸

自為常也智者不然臣聞魏氏悉其百縣勝甲以上戍

大梁臣以為不下三十萬以三十萬之衆守梁七仞之

城集解駟案小爾雅曰四尺謂之仞倍仞謂之尋

臣以為湯武復生不易攻也

夫輕背楚趙之兵陵七仞之城戰三十萬之衆而志必

舉之臣以為自天地始分以至于今未嘗有者也攻而

不拔秦兵必罷陶邑必亡

索隱陶一作魏言秦前攻得魏之城邑秦罷則亡而還於

魏也正義定陶近大梁穰侯攻梁兵疲定陶必為魏伐

則前功必棄矣今魏氏方

疑可以少割收也

索隱賈引魏人之說不許王講於秦是言魏氏方疑可以少割地而收魏

也願君逮楚趙之兵未至於梁亟以少割收魏魏方疑

而得以少割為利必欲之則君得所欲矣楚趙怒於魏

之先已也必爭事秦從以此散

索隱楚趙怒魏之與秦講皆爭事秦是東方從

國於是解散也正義從足松反

而君後擇焉且君之得地豈必以兵哉

割晉國秦兵不攻而魏必效絳安邑又為陶開兩道

索隱

穰侯封陶魏效絳與安邑是得河東地言從秦遠陶開河西河東之兩道正義穰故封定陶故宋及單父是陶之南道也魏之安邑及絳是陶北道幾盡故宋

索隱幾音祈此時宋已滅是秦將盡得宋地也衛

必效單父秦兵可全而君制之何索而不得何為而不

成願君熟慮之而無行危

索隱言莫行圍梁之危事

穰侯曰善乃罷

梁圍

正義表云魏安釐王二年秦軍大梁城韓來救與秦溫以和也

明年魏背秦與齊

從親秦使穰侯伐魏斬首四萬走魏將暴鳶得魏三縣

穰侯益封明年穰侯與白起客卿胡傷復攻趙韓魏破

芒卯於華陽下斬首十萬取魏之卷

集解駟案
丘權反

蔡陽長

社趙氏觀津且與趙觀津益趙以兵伐齊

索隱既得觀
津仍令趙伐

齊而秦又以
兵益助趙也

齊襄王懼使蘇代為齊陰遺穰侯書曰臣

聞往來者言曰秦將益趙甲四萬以伐齊臣竊必之弊

邑之王曰

索隱告齊王言秦必定不益兵以助趙正義
臣蘇代也必知秦與趙甲四萬以伐齊王謂

齊王也

秦王明而熟於計穰侯智而習於事必不益趙甲

四萬以伐齊是何也夫三晉之相與也秦之深讐也百

相背也百相欺也不為不信不為無行今破齊以肥趙

趙秦之深讐不利於秦此一也秦之謀者必曰破齊弊

晉楚

正義今晉楚伐齊
晉楚之國亦弊敗

而後制晉楚之勝夫齊罷國也

以天下攻齊如以千鈞之弩決潰癰也必死安能弊晉

楚此二也秦少出兵則晉楚不信也多出兵則晉楚為

制於秦齊恐不走秦必走晉楚此三也秦割齊以啖晉

楚晉楚案之以兵秦反受敵此四也是晉楚以秦謀齊

以齊謀秦也何晉楚之智而秦齊之愚此五也故得安

邑以善事之亦必無患矣秦有安邑韓氏必無上黨矣

取天下之腸胃與出兵而懼其不反也孰利臣故曰秦

王明而熟於計穰侯智而習於事必不益趙甲四萬以

伐齊矣於是穰侯不行引兵而歸昭王三十六年相國

穰侯言客卿竈欲伐齊取剛壽

集解徐廣曰濟北有剛縣正義故剛城在兗州

龔丘縣界壽張鄆州縣也

以廣其陶邑於是魏人范雎自謂張祿先

生譏穰侯之伐齊乃越三晉以攻齊也以此時奸說秦

昭王昭王於是用范雎范雎言宣太后專制穰侯擅權於諸侯涇陽君高陵君之屬太侈富於王室於是秦昭王悟乃免相國令涇陽之屬皆出關就封邑穰侯出關輜車千乘有餘穰侯卒於陶而因葬焉秦復收陶為郡太史公曰穰侯昭王親舅也而秦所以東益地弱諸侯嘗稱帝於天下天下皆西鄉稽首者穰侯之功也及其貴極富溢一夫開說身折勢奪而以憂死況於羈旅之臣乎

索隱述贊曰穰侯智識應變無方內倚太后外輔昭
王四登相位再列封疆摧齊撓楚破魏圍梁一夫開
說憂憤而亡

史記卷七十二

史記卷七十二考證

穰侯列傳戰勝暴子○戰國策作畢子

此臣之所聞於魏也索隱須賈說穰侯言魏人謂梁王若少割而求質必是欺我即聞魏見欺於秦也○董份曰自臣聞至不然必見欺皆須賈述衛人之言故結之曰此臣之所聞于魏也言其所聞于魏之言如此也詞意極明索隱解謬

穰侯與白起客卿胡傷復攻趙韓魏破芒卯於華陽下

○戰國策校注曰大事記華陽之役秦救韓而擊趙
魏年表列傳或云得三晉將或云攻趙韓魏皆記者
之誤

斬首十萬○秦本紀作十五萬

史記卷七十二考證

謹案卷七十第三頁後一行讀為芭黎之芭刊本
芭訛芭下同據毛本索隱改

第三頁後七行合州石鏡縣刊本鏡訛饒據唐地
志改

第四頁前七行洛州緱氏縣刊本緱訛維據唐地
志改

第六頁前五行魏固八上郡少梁刊本上訛土今
改

卷七十一第二頁後三行知伯欲伐仇猶國刊本
脫仇字據韓非子增

卷七十二第五頁前一行小爾雅曰四尺謂之仞
刊本脫小字據小爾雅增

藥庫
金壽會
對寶

總校官庶吉士

臣

侍

朝

校對官檢討

臣

王鍾健

膳錄監生

臣

張誠智

膳錄監生

臣

張曾溶

欽定四庫全書薈要

史部

史記卷七十三至
五

詳校官主事銜臣徐以坤



史記卷七十三

漢 太 史 令司馬遷 撰

宋中郎外兵曹參軍裴 駟集解

唐國子博士弘文館學士司馬貞索隱

唐諸王侍讀率府長史張守節正義

白起王翦列傳第十三

白起者郿人也

正義郿音
眉岐州縣

善用兵事秦昭王昭王十三

年而白起為左庶長將而擊韓之新城

索隱在河南也正義今洛州伊

關

是歲穰侯相秦舉任鄙以為漢中守其明年白起為

左更攻韓魏於伊闕

正義今洛城南十九里伊闕山號曰龍門是也

斬首二十

四萬又虜其將公孫喜拔五城起遷為國尉

正義言太尉

涉

河取韓安邑以東到乾河

集解徐廣曰音干駟案郭璞曰今河東聞喜縣東北有乾

河口因名乾河里但有故溝處無復水也索隱魏以安邑入秦然安邑以東至乾河皆韓故地故云取韓安邑

明年白起為大良造攻魏拔之取城小大六十一明年

起與客卿錯攻垣城拔之

集解徐廣曰河東垣縣

後五年白起攻

趙拔光狼城

索隱地理志不載光狼城蓋屬趙國正義光狼故城在澤州高平縣西二十五里也

後七年白起攻楚拔鄢鄧五城

集解徐廣曰昭王二十八年正義鄢鄧二邑在

襄州

其明年攻楚拔鄢燒夷陵

正義夷陵今硤州郭下縣

遂東至竟陵

正義故城在鄢州長壽縣南百五十里今復州亦是其地也

楚王亡去鄢東走徙陳

秦以郢為南郡白起遷為武安君武安君因取楚定巫

黔中郡昭王三十四年白起攻魏拔華陽走芒卯而虜

三晉將斬首十三萬與趙將賈偃戰沉其卒二萬人於

河中昭王四十三年白起攻韓陘城

正義陘城故城在曲沃縣西北二十

里在絳州東北
三十五里也

拔五城斬首五萬四十四年白起攻南

陽太行道絕之

集解徐廣曰此南陽河內脩武是也正
義案南陽屬韓秦攻之則韓太行羊腸

道絕
矣

四十五年伐韓之野王

索隱地理志野王縣屬河
內在太行東南孟康曰古

邢國
也

野王降秦上黨道絕其守馮亭與民謀曰鄭道已

絕

集解徐廣曰河南新鄭韓之國都也索隱鄭國即韓
韓之都在河南秦伐野王是上黨歸韓之道絕也韓

必不可得為民秦兵日進韓不能應不如以上黨歸趙

趙若受我秦怒必攻趙趙被兵必親韓韓趙為一則可

以當秦因使人報趙趙孝成王與平陽君平原君計之

索隱平陽君未詳何人

平陽君曰不如勿受受之禍大於所得平

原君曰無故得一郡受之便趙受之因封馮亭為華陽

君

正義常山一名華陽解在趙世家

四十六年秦攻韓緹氏蘭

集解徐廣曰屬

潁川索隱今其地關西河別有蘭縣也正義按檢諸地記潁川無蘭括地志云洛州嵩縣本夏之綸國也在緹氏東南六十里地理志云綸氏屬潁川郡按既攻緹氏蘭二邑合相近恐綸蘭聲相似字隨音而轉作蘭

之四十七年秦使左庶長王齕

集解駟案音紇

攻韓取上黨上

黨氏走趙趙軍長平

集解徐廣曰在注氏索隱地理志注氏今在上黨郡也正義長平故

城在澤州高平縣西北一里也

以按據上黨民

索隱謂屯兵長平以據援上黨

四月齕

因攻趙趙使廉頗將趙軍士卒犯秦斥兵

索隱謂犯秦之斥候兵也

秦斥兵斬趙裨將茄

索隱音加裨將名

六月陷趙軍取二鄣四

尉

索隱鄣堡城尉官也正義括地志云趙鄣故城一名都尉城今名趙東城在澤州高平縣西二十五里又

有故穀城北二城即二鄣也

七月趙軍築壘壁而守之秦又攻其壘

取二尉敗其陣

集解徐廣曰一作乘

奪西壘壁

正義趙西壘在澤州高平縣北六里

是也即廉頗堅壁以待秦王配奪趙西壘壁者

廉頗堅壁以待秦秦數挑戰

正義

數音朔挑田鳥反

趙兵不出趙王數以為讓而秦相應侯又使

人行千金於趙為反間

正義紀

曰秦之所惡獨畏馬服

子趙括將耳廉頗易與且降矣趙王既怒廉頗軍多失

亡軍數敗又反堅壁不敢戰而又聞秦反間之言因使

趙括代廉頗將以擊秦秦聞馬服子將乃陰使武安君

白起為上將軍而王齕為尉裨將令軍中有敢泄武安

君將者斬趙括至則出兵擊秦軍秦軍詳敗而走

正義詳音

羊張二奇兵以劫之趙軍逐勝追造秦壁

正義秦壁一名秦壘今亦

名秦壘壁堅拒不得入而秦奇兵二萬五千人絕趙軍後

又一軍五千騎絕趙壁間趙軍分而為二糧道絕而秦

出輕兵擊之趙戰不利因築壁堅守

正義趙壁今名趙東壁亦名趙東長

壘在澤州高平縣北五里即趙括築壁自敗處

以待救至秦王聞趙食道絕王

自之河內賜民爵各一級發年十五以上悉詣長平

索隱

時已屬秦故發其兵

遮絕趙救及糧食至九月趙卒不得食四十

六日皆內陰相殺食來攻秦壘欲出為四隊四五復之

不能出其將軍趙括出銳卒自搏戰秦軍射殺趙括括

軍敗卒四十萬人降武安君武安君計曰前秦已拔上

黨上黨民不樂為秦而歸趙趙卒反覆非盡殺之恐為

亂乃挾詐而盡阬殺之遺其小者二百四十人歸趙前

後斬首虜四十五萬人趙人大震四十八年十月秦復

定上黨郡

索隱秦前攻趙已破上黨今迴兵復定其郡其餘城猶屬趙

秦分軍為二

王齕攻皮牢拔之

正義故城在絳州龍門縣西一里

司馬梗定太原

正義

太原趙地秦定取也

韓趙恐使蘇代厚幣說秦相應侯曰武安君

禽馬服子乎曰然又曰即圍邯鄲乎曰然趙亡則秦王

王矣武安君為三公武安君所為秦戰勝攻取者七十

餘城南定鄢郢漢中

正義鄢在襄州夷道縣南九里郢在荊州江陵縣東六里漢中今梁

州之北禽趙括之軍雖周召呂望之功不益於此矣今

趙亡秦王王則武安君必為三公君能為之下乎雖無

欲為之下固不得已矣秦嘗攻韓圍邢丘

集解徐廣曰平舉有邢丘

正義邢丘今懷州武陵縣東南二十里平高縣城是也

困上黨上黨之民皆反為

趙天下不樂為秦民之日久矣今亡趙北地入燕東地

入齊南地入韓魏則君之所得民亡幾何人

集解徐廣曰亡音無

也故不如因而割之

正義因白起之攻割取韓趙之地

無以為武安君

功也於是應侯言於秦王曰秦兵勞請許韓趙之割地

以和且休士卒王聽之割韓垣雍趙六城以和

集解徐廣曰卷

縣有垣雍城正義釋地名云卷縣所理垣雍城按今在鄭州原武縣西北七里也

正月皆罷兵

武安君聞之由是與應侯有隙其九月秦復發兵使五

大夫王陵攻趙邯鄲是時武安君病不任行

正義任入針反堪也

四十九年正月陵攻邯鄲少利秦益發兵佐陵陵兵亡

五校武安君病愈秦王欲使武安君代陵將武安君言

曰邯鄲實未易攻也且諸侯救日至彼諸侯怨秦之日

久矣今秦雖破長平軍而秦卒死者過半國內空遠絕

河山而爭人國都趙應其內諸侯攻其外破秦軍必矣
不可秦王自命不行乃使應侯請之武安君終辭不肯

行遂稱病秦王使王齕代陵將八九月圍邯鄲不能拔

楚使春申君及魏公子將兵數十萬攻秦軍秦軍多失

亡武安君言曰秦不聽臣計今如何矣秦王聞之怒彊

起武安君

正義彊其兩反

武安君遂稱病篤應侯請之不起於

是免武安君為士伍遷之陰密

集解徐廣曰屬安定正義故城在涇州鶉觚縣

城西即古陰密國密康公國也

武安君病未能行居三月諸侯攻秦軍

急秦軍數却使者曰至秦王乃使人遣白起不得留咸

陽中武安君既行出咸陽西門十里至杜郵

索隱按故咸陽城在

渭北杜郵今在咸陽城中正義說文云郵境上行舍道
路所經過今咸陽縣城本秦之郵也在雍州西北三十

五里秦昭王與應侯羣臣議曰白起之遷其意尚快快不

服有餘言秦王乃使使者賜之劍自裁武安君引劍將

自剄曰我何罪于天而至此哉良久曰我固當死長平

之戰趙卒降者數十萬人我詐而盡阬之是足以死遂

自殺武安君之死也以秦昭王五十年十一月死而非

其罪秦人憐之鄉邑皆祭祀焉

集解何晏曰白起之降趙卒詐而阬其四十萬

豈徒酷暴之謂乎後亦難以重得志矣向使衆人皆豫知降之必死則張虛掩猶可畏也況於四十萬被堅執

銳哉天下見降秦之將頭顱似山歸秦之衆骸積成丘則後日之戰死當死耳何衆肯服何城肯下乎是為雖能裁四十萬之命而適足以彊天下之戰欲以要一朝之功而乃更堅諸侯之守故兵進而自伐其勢軍勝而還喪其計何者設使趙衆復合馬服更生則後日之戰必非前日之對也况今皆使天下為後日乎其所以終不敢復加兵於邯鄲者非但憂平原之補袒患諸侯之掣至也徒諱之而不言耳若不悟而不諱則母所以遠智也可謂善戰而拙勝長平之事秦民之十五以上者皆荷戰而向趙矣秦王又親自賜民爵於河內夫以秦彊而十五以上死傷過半者此為破趙之功小傷秦之敗大又何以稱奇哉若後之役戍不豫其論者則秦衆

多矣降者可致也必不可致者本自當戰殺不當受降
詐也戰殺雖難降殺雖易然降殺之為害禍大於劇戰
也索隱捲音拳袒音濁
覓反字亦作綻採音救

王翦者頻陽東鄉人也

索隱地理志頻陽縣屬左馮翊應劭曰在頻水之陽也正義故

城在雍州東同官縣界也

少而好兵事秦始皇始皇十一年翦將攻

趙閼與

正義與音預

破之拔九城十八年翦將攻趙歲餘遂

拔趙趙王降盡定趙地為郡明年燕使荆軻為賊於秦

秦王使王翦攻燕燕王喜走遼東翦遂定燕薊而還

正義

計薊音

秦使翦子王賁擊荆

集解徐廣曰秦諱楚故云荆也索隱賁音奔

荆兵

敗還擊魏魏王降遂定魏地秦始皇既滅三晉走燕王
而數破荆師秦將李信者年少壯勇嘗以兵數千逐燕
太子丹至於衍水中卒破得丹始皇以為賢勇於是始
皇問李信吾欲攻取荆於將軍度用幾何人而足李信
曰不過用二十萬人始皇問王翦王翦曰非六十萬人
不可始皇曰王將軍老矣何怯也李將軍果勢壯勇

集解

徐廣曰勢一作新

其言是也遂使李信及蒙恬將二十萬南伐

荆王翦言不用因謝病歸老於頻陽李信攻平與

集解駢案

音余正義在預蒙恬攻寢集解徐廣曰今固始寢丘索東北五十四里

也大破荊軍信又攻鄢郢破之於是引兵而西與蒙恬

會城父

索隱在汝南即應鄉正義言引兵而會城父則是汝州郟城縣東父城者也括地志云汝州郟

城縣東四十里有父城故城即服虔云城父楚北境者也又許州葉縣東北四十五里亦有父城故城即杜預云襄城城父縣者也此二城父城之名耳服虔城父是誤也左傳及注水經云楚大城城父使太子建居之十三州志云太子建所居城父謂今亳州城父是也此三家之說是城父之名地理志云潁川父城縣沛郡城父縣據縣屬郡其名自分古

先儒多惑故使其名錯亂荆人因隨之三日三夜不頓

舍大破李信軍入兩壁殺七都尉秦軍走始皇聞之大

怒自馳如頻陽見謝王翦曰寡人以不用將軍計李信

果辱秦軍今聞荆兵日進而西將軍雖病獨忍棄寡人

乎王翦謝曰老臣罷病悖亂

正義罷音皮悖音背

唯大王更擇賢

將始皇謝曰已矣將軍勿復言王翦曰大王必不得已

用臣非六十萬人不可始皇曰為聽將軍計耳於是王

翦將兵六十萬人始皇自送至灞上王翦行請美田宅

園池甚衆始皇曰將軍行矣何憂貧乎王翦曰為大王

將有功終不得封侯故及大王之嚮臣臣亦及時以請

園池為子孫業耳始皇大笑王翦既至關使使還請善

田者五輩

集解徐廣曰善一作苗索隱謂使者五度請也

或曰將軍之乞貸亦

已甚矣王翦曰不然夫秦王怛

集解駉案音麓

而不信人

集解徐廣

曰怛一作粗

今空秦國甲士而專委於我

集解徐廣曰專亦作搏又作刺

我

不多請田宅為子孫業以自堅顧令秦王坐而疑我邪

王翦東伐李信擊荆荆聞王翦益軍而來乃悉國中兵

以拒秦王翦至堅壁而守之不肯戰荆兵數出挑戰終

不出王翦曰休士洗沐而善飲食撫循之親與士卒同

食久之王翦使人問軍中戲乎對曰方投石超距

集解
徐廣

曰超一作拔駟案漢書云甘延壽投石拔距絕於等倫
張晏曰范蠡兵法飛石重十二斤為機發行三百步延

壽有力能以手投之拔距超
距也索隱超距猶跳躍也

於是王翦曰士卒可用矣

荆數挑戰而秦不出乃引而東翦因舉兵追之令壯士

擊大破荆軍至蘄南

正義徐
州縣也

殺其將軍項燕荆兵遂敗

走秦因乘勝畧定荆地城邑歲餘虜荆王負芻竟平荆

地為郡縣因南征百越之君而王翦子王賁與李信破

定燕齊地秦始皇二十六年盡并天下王氏蒙氏功為

多名施於後世秦二世之時王翦及其子賁皆已死而
又滅蒙氏陳勝之反秦秦使王翦之孫王離擊趙圍趙
王及張耳鉅鹿城正義今邢州平鄉縣城本秦鉅鹿郡城也或曰王離秦之
名將也今將彊秦之兵攻新造之趙舉之必矣客曰不
然夫為將三世者必敗必敗者何也以其所殺伐多矣
其後受其不祥今王離已三世將矣居無何項羽救趙
擊秦軍果虜王離王離軍遂降諸侯

太史公曰鄙語云尺有所短寸有所長白起料敵合變

出奇無窮聲震天下然不能救患於應侯王翦為秦將
夷六國當是時翦為宿將始皇師之然不能輔秦建德
固其根本偷合取容以至刼身集解徐廣曰刼音沒及孫王離為
項羽所虜不亦宜乎彼各有所短也

索隱述贊曰白起王翦俱善用兵遽為秦將拔齊破
荆趙仕馬服長平遂阮楚陷李信霸上卒行貢離繼
出三代
無名

史記卷七十三

史記卷七十三考證

白起王翦列傳昭王十三年而白起為左庶長○秦本紀昭王十三年起為左更

明年白起為大良造攻魏拔之取城小大六十一明年

起與客卿錯攻垣城拔之○

臣照

按此與秦本紀魏

世家六國表所載互異紀云十五年大良造白起攻魏取垣復予之十六年左更錯取軹及鄧魏世家云秦拔我城大小六十一則當在昭王十七年此傳却

在昭王十五年六國表昭王十八年客卿錯擊魏至軹取城大小六十一年分不同事亦不一

武安君因取楚定巫黔中郡○秦本紀蜀守若伐取巫郡及江南為黔中郡非起所取與此互異

而虜三晉將斬首十三萬○秦本紀及六國表皆作十五萬五訛為三或傳寫之誤穰侯傳又作十萬

昭王四十三年白起攻韓陘城拔五城○秦本紀云拔九城韓世家及六國表云秦拔我陘城汾城

趙孝成王與平陽君平原君計之索隱平陽君未詳何人○臣照按平陽君趙豹起世家注云戰國策曰惠文王母弟也

其九月秦復發兵使五大夫王陵攻趙邯鄲○秦本紀作十月

遷之陰密正義即古陰密國○秦本紀正義云即古密須國

以秦昭王五十年十一月死○秦本紀作十二月

史記卷七十三考證

史記卷七十四

漢 太 史 令司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

孟子荀卿列傳第十四

索隱按序傳孟嘗君第十四而此傳為第十五蓋後人差降之矣

太史公曰余讀孟子書至梁惠王問何以利吾國未嘗
不廢書而歎也曰嗟乎利誠亂之始也夫子罕言利者
常防其原也故曰放於利而行多怨自天子至於庶人
好利之弊何以異哉

孟軻鄒人也

索隱軻音苦何反又苦賀反鄒魯地名又云本邾人徙鄒故也正義軻字子輿為齊

卿鄒究州縣

受業子思之門人

索隱王邵以人為衍字則以軻親受業孔伋之門也今言

門人者乃受業於子思之弟子也

道既通游事齊宣王宣王不能用適

梁梁惠王不果所言則見以為迂遠而濶於事情當是

之時秦用商君富國彊兵楚魏用吳起戰勝弱敵齊威
王宣王用孫子田忌之徒而諸侯東面朝齊天下方務
於合從連衡以攻伐為賢而孟軻乃述唐虞三代之德
是以所如者不合退而與萬章之徒

索隱孟子有萬章
公明高等蓋並軻

之門人也
萬姓章名

序詩書述仲尼之意作孟子七篇其後有騶

子之屬齊有三騶子其前鄒忌以鼓琴干威王因及國
政封為成侯而受相印先孟子其次騶衍後孟子騶衍
睹有國者益淫侈不能尚德若大雅整之於身施及黎

庶矣乃深觀陰陽消息而作怪迂之變終始大聖之篇
十餘萬言其語閎大不經必先驗小物推而大之至於
無垠先序今以上至黃帝學者所共術大並世盛衰

集解

駟案並蒲浪反索隱言其並
大體隨代盛衰觀時而說事

因載其機祥度制推而遠

之至天地未生窈冥不可考而原也先列中國名山大
川通谷禽獸水土所殖物類所珍因而推之及海外人
之所不能睹稱引天地剖判以來五德轉移治各有宜
而符應若茲以為儒者所謂中國者於天下乃八十一

分居其一分耳

索隱桓寬王充並以衍之所言迂怪虛妄榮惑六國之君因納其異說所謂匹

夫而榮惑諸侯也

中國名曰赤縣神州赤縣神州內自有九州

禹之序九州是也不得為州數中國外如赤縣神州者

九乃所謂九州也於是有裨海環之

索隱裨音脾裨海小海也九州之外

更有大瀛海故知此裨是小海也且將有裨將裨是小義也

人民禽獸莫能相通者

如一區中者乃為一州如此者九乃有大瀛海環其外

天地之際焉其術皆此類也然要其歸必止乎仁義節

儉君臣上下六親之施始也濫耳

索隱濫即濫觴是江源之初始故此文意

以濫為初也謂行之術言君臣上下六親之際行事之所施所治皆可以為後代之本故云濫耳

王公

大人初見其術懼然顧化

索隱懼音叩謂行之術皆動人心見者莫不懼然駐想又

內心留顧而已化之欲從其術也化者是易常聞而貴異術也

其後不能行之是以駟

子重於齊適梁梁惠王郊迎執賓主之禮適趙平原君

側行敝席

索隱按字林云敝音疋結反韋昭音敷葢反張揖三蒼訓詁云敝拂也謂側行而衣敝席

為敬不敢正坐當賓主之禮也

如燕昭王擁彗先驅

索隱彗帚也謂為之掃地以衣袂擁

帚而却行恐塵埃之及長者所以為敬也

請列弟子之座而受業築碣石宮

正義碣石宮在幽州薊縣西三十里寧臺之東

身親往師之作主運

索隱劉向別錄云鄒

子書有
主運篇
其游諸侯見尊禮如此豈與仲尼菜色陳蔡孟

軻困於齊梁同乎哉

索隱仲尼孟子法先王之道行仁義之化且菜色困窮而鄒衍執詭

怪熒惑諸侯其見禮重如此可為長太息哉

故武王以仁義伐紂而王伯夷

餓不食周粟衛靈公問陳而孔子不答梁惠王謀欲攻

趙孟軻稱太王去邠

索隱孟子太王去邠是軻對滕文公語今云梁惠王謀攻趙與孟子

不此豈有意阿世俗苟合而已哉持方枘欲內圓鑿其

能入乎

索隱方枘是苟也圓鑿是孔也謂工人斲木以方苟而內之圓孔不可入也故楚詞云以方枘

而納圓鑿者吾知其齟齬而不入也謂戰國時仲尼孟軻以仁義干世主猶方枘圓鑿然也

或曰伊

尹負鼎而勉湯以王百里奚飯牛車下而繆公用霸作

先合然後引之大道騶衍其言雖不軌儻亦有牛鼎之

意乎

索隱呂氏春秋云涵牛之鼎不可以烹雞是其有牛鼎也言衍之術迂大儻若大用之是有牛鼎之意

而譙周亦云觀太史公此論是愛奇之甚矣自騶衍與齊之稷下先生如淳

于髡慎到環淵接子田駢騶奭之徒

索隱按稷齊之城門也或云稷山名

謂齊之學士集於稷門之下也環淵接子古著書人之稱號也駢音步堅反又步經反正義慎子十卷在法家則戰國時處士接子二篇田子二十五篇齊人游稷下號天口接田二人道家騶奭十二篇陰陽家各著

書言治亂之事以干世主豈可勝道哉

淳于髡齊人也博聞彊記學無所主其陳說慕晏嬰之
為人也然而承意觀色為務客有見髡於梁惠王惠王
屏左右獨坐而再見之終無言也惠王怪之以讓客曰
子之稱淳于先生管晏不及及見寡人寡人未有得也
豈寡人不足為言邪何故哉客以謂髡髡曰固也吾前
見王王志在驅逐後復見王王志在音聲吾是以默然
客具以報王王大駭曰嗟乎淳于先生誠聖人也前淳
于先生之來人有獻善馬者寡人未及視會先生至後

先生之來人有獻謳者未及試亦會先生來寡人雖屏人然私心在彼有之

索隱謂私心實在彼馬與謳也有之謂我實有此二事也

後淳

于髡見壹語連三日三夜無倦惠王欲以卿相位待之
髡因謝去於是送以安車駕駟束帛加璧黃金百鎰終
身不仕

慎到趙人田駢接子齊人環淵楚人皆學黃老道德之

術因發明序其指意故慎到著十二論

集解徐廣曰今慎子劉向所定

有四一篇環淵著上下篇而田駢接子皆有所論焉

騶與者齊諸騶子亦頗采騶衍之術以紀文於是齊王

嘉之自如淳于髡以下皆命曰列大夫為開第康莊之

衢

集解駢案爾雅曰四通謂之衢五達謂之康六達謂之莊

高門大屋尊寵之覽天

下諸侯賓客言齊能致天下賢士也

荀卿趙人

索隱名况卿者時人相尊而號為卿也仕齊為祭酒仕楚為蘭陵令後亦謂之孫卿子者

避漢宣帝諱也

年五十始來游學於齊騶衍之術迂大而閎辯

與也文具難施淳于髡久與處時有得善言故齊人頌

曰談天衍雕龍奭炙轂

集解徐廣曰一作亂調

過髡

集解駢案劉向別錄曰騶

衍之所言五德終始天地廣大書言天事故曰談天騶
與脩衍之文飾若雕鏤龍文故曰雕龍別錄曰過字作
輶輶者車之盛膏器也炙之雖盡猶有餘流者言淳于
髡智不盡如炙輶也左思齊都賦注曰言其多智難盡
如脂膏過之有潤澤也索隱劉氏云穀衍字也今按文
稱炙穀過過則是器名音如字謂盛脂之器名過與錫
字相近蓋即指器也穀即車穀過
為潤穀之物則穀非衍字明矣 田駢之屬皆已死齊

襄王時

索隱襄王名法章
王子宮人所立者

而荀卿最為老師齊尚脩

列大夫之缺而荀卿三為祭酒焉

索隱禮食必祭先飲
酒亦然必以席中之

尊者一人當祭耳後因以為官名故吳王濞為劉氏祭
酒是也而卿三為祭酒者謂荀卿出入前後三度處列
大夫康莊之位而皆為
其所尊故云三為祭酒齊人或譏荀卿荀卿乃適楚而

春申君以為蘭陵令

正義蘭陵縣屬東海郡今沂州承縣有蘭陵山

春申君死

而荀卿廢因家蘭陵李斯嘗為弟子已而相秦荀卿嫉

濁世之政亡國亂君相屬不遂大道而營於巫祝信機

祥鄙儒小拘如莊周等又滑稽亂俗於是推儒墨道德

之行事興壞序列著數萬言而卒因葬蘭陵而趙亦有

公孫龍為堅白同異之辯

集解駟案晉太康地記云汝南西平縣有龍淵水可用淬

刀劍特堅利故有堅白之論云黃所以為堅也白所以為利也或辯之曰白所以為不堅黃所以為不利索隱

龍即仲尼弟子也此云趙人弟子傳作衛人鄭玄云楚人各不能知其真又下文云並孔子同時或云在其後

所以知非別人也正義藝文志公孫龍子十四篇顏師古云即為堅白之辯按平原君傳鄒衍同時括地志云

西平縣豫州西北百四十里有龍淵水也**劇子之言**集解徐廣曰按應劭氏姓注直云處子也索隱

著書之人姓劇氏而稱子也前史不記其名故趙有劇孟及劇辛也**魏有李悝盡地力之**

教正義藝文志李悝相魏文侯富國強兵**楚有尸子長盧**集解駟

李悝相魏文侯富國強兵

案劉向

別錄曰楚有尸子疑謂其在蜀今案尸子書晉人也名

佼秦相衛鞅客也衛鞅商君謀事畫計立法理民未嘗

不與佼規也商君被刑佼恐并誅乃亡逃入蜀自為造

此二十篇書凡六萬餘言卒因葬蜀索隱尸子名佼音

絞長盧未詳正義

阿之吁子焉集解徐廣曰阿者今之東阿索隱吁音芋別錄

作芋子今吁亦如字正義按東齊州也藝文志云芋子

十八篇名嬰齊人七十子之後顏師古云音弭按是齊

人阿又屬齊
恐顏公誤也

自如孟子至于吁子世多有其書故不論

其傳云蓋墨翟宋之大夫善守禦為節用

集解駟案墨子曰公輸般

為雲梯之械成將以攻宋墨子聞之至于郢見公輸般
墨子解帶為城以牒為械公輸般九設攻城之機變墨
子九距之公輸般之攻械盡墨子之守固有餘公輸般
訕而言曰吾知所以距子矣吾不言墨子亦曰吾知子
之所以距我者吾不言楚王問其故墨子曰公輸子之
意不過欲殺臣殺臣宋莫能守可攻也然臣之弟子禽
滑釐等三百人已持臣守國之器在宋城上而待楚寇
矣雖殺臣不能絕也楚王曰善哉吾請無攻宋城矣索
隱公輸為雲梯之械者按梯構木瞰高也雲者言其昇
高入雲故曰雲梯械者器也謂攻城之樓櫓也與器械
同墨子解帶為城者謂墨子所術解身上草帶以為城
也以牒為械者牒小木札也械者樓櫓等公輸般之攻

械盡者劉氏云械謂飛梯撞車飛石車弩之具也誑音
屈謂般技已盡墨守有餘滑釐者墨子弟子之字也釐
音狸或曰並孔子時或曰在其後索隱按別錄云墨子書
有文子文子子夏之弟

子問於墨子如此則墨
子者在七十子後也

索隱述贊曰六國之末戰勝相雄軻遊齊魏其說不
通退而著述稱吾道窮蘭陵事楚鄒衍談空康莊雖
列莫見
收功

史記卷七十四

史記卷七十四考證

孟子荀卿列傳始也濫耳索隱濫即濫觴是江源之初
始故此文意以濫為初也○顧炎武曰濫者汜而無
節之謂猶莊子之洗洋自恣也注引濫觴之義以為
初者非

儻亦有牛鼎之意乎索隱呂氏春秋云函牛之鼎不可
以烹鷄是其有牛鼎也言衍之術迂大儻若大用之
是有牛鼎之意而譙周亦云觀太史公此論是愛奇

之甚矣 詹惟修曰牛鼎之說不必他求即上文伊尹負鼎百里奚飯牛也索隱舉呂氏春秋及譙周之說意竊不然太史公言孔孟不合于當時者始進不能投時好如尹與奚也今衍以不軌之說見尊於諸侯是尹鼎奚牛之意豈若孔孟哉二子求奇太過是遺近而求遠

春申君死而荀卿廢○

臣照

按戰國策及韓詩外傳春

申君因客之說使人謝孫子孫子去之趙趙以為上

卿又因客之說使人請於趙孫子偽喜謝之以書因
為賦遺之中有讒夫將將以瞽為明以聾為聰之語
是春申未死而荀卿已去蘭陵矣荀子賦篇可證也
馬遷之說與諸家異

史記卷七十四考證